
Bhajan Mala

भजन माला

Bhajan Mala

उमा गुरखा

Internet Edition: **M.K.Raina**

Uma Gurkha

नमो नमो गजेंद्राय, एक दंत दराय च ।
नमो ईश्वर पुत्राय , श्री गणेशाय नमो नमः ॥

Bhajan Mala

Uma Gurkha

Internet Edition: M.K.Raina

Second Edition, August 2003

Copyright © 2003 by **Kashmir News Network (KNN)** (<http://iKashmir.net>)

All rights reserved. No part of this publication may be reproduced in whole or in part, or stored in a retrieval system, or transmitted in any form or by any means, electronic, mechanical, photocopying, recording, or otherwise, without written permission of Kashmir News Network. For permission regarding publication, send an e-mail to

editor@iKashmir.net

About the poetess

Uma Gurkha alias Chuni Thusu

Uma Gurkha belongs to a respectable Kashmiri Hindu family. Her grand father (nanaji) was an ardent follower of the great saint Swami Kailashji. The family was a centre of religious activities. Songs, Kirtans, Bhajans etc. were part of her daily chores. Her marriage to the late TN Gurkha in 1943 didn't curb this fervour. She got the required encouragement to follow her pursuits from her father in-law and in particular her maternal uncle. Umaji had no formal education. She has no claims as a well read lady but she is beloved daughter of Muse and Goddess Saraswati inspires her to compose religious & holy Bhajans, which formed the part of this humble presentation. Whole of this collection must have gathered dust and got buried into the burial of times but for sustained efforts and care of her eldest daughter Mrs. Krishna Raina's extraordinary measures for its preservation that has shown keenness to ensure that people at large and our community in particular can derive benefit from it.

Ratnesh Raina

'Kong-Posh'

11, Mahender Nagar, Jammu Tawi.

Tel: 554193.

1. गणेश अस्तुति

गौरी ये'लि छोंड पनुँनुय वर
छोंडुन जगत्तुक परमीश्वर ।
गर्दव लूख आस पोशुँ पूजाये
ऊँ श्री गणेशाय नमः ॥

छुख गौरी हुंद टोट पो'थुर
छिय बबस आसवुँन्य् त्रे' न्यथुँर ।
नाव चोन वखुँनान ग्वडुँ पूजाये,
ऊँ श्री गणेशाय नमः ॥

युस यियि च्य निश पजि भावुँनाये
तस छि गछान स्यजुँ कामुँनाये ।
सूँत्य–सूँत्य रोजान तिमन दयाये
ऊँ श्री गणेशाय नमः ॥

युस यियि च्य निश लोलुँ तुँ माये
करि चॉनिय यॉच पादि पूजा ।
अदुँ जन्म तस कति गछि जांह जाये
ऊँ श्री गणेशाय नमः ॥

शुकलाम्बरधरं जामुँ छिय नॉली
नॉली त्रावुँहय बादाम तुँ खाऽली ।
पॉर्य–पॉर्य लगुँहय बजि शूभाये
ऊँ श्री गणेशाय नमः ॥

लोलुँ सान दॉसी डेडि तल आये
लोलुँच पोशुँमाल छस अथस क्यथ ।
तुलि–तुलि लागुँहय बजि भावनाये
ऊँ श्री गणेशाय नमः ॥

आरुँच उमा डेडि तल आये
आर्यत्यन नादन थवतस कन ।
कासतस गम तय बरतस माये
ऊँ श्री गणेशाय नमः ॥



2. मीरा बजन

तस आसि खसुन गुर तुँ वसनस नाव
यस आसि टोठ श्री कृष्ण नाव ।
तस कथ पोरि वाव तय ताव
यस आसि टोठ श्री कृष्ण नाव ॥

मीरायि दायि क्याह हॉवनस माय
कंड्यव सूँत्य् थँवनस बँरिथ बिहिन्य् जाय ।
तिमन कंड्यन तस बनेयि पोशुँ अंबार
यस आसि टोठ श्री कृष्ण नाव ॥

मीरायि पूजाँ आँस जाँरी
ब्रोंटुँकनि थँवुँहस स्वरफुँ डॉली ।
सूँचुख अज चलि सोन व्वन्य् दाव
यस आसि टोठ श्री कृष्ण नाव ॥

मीरायि ये'लि स्वरुफ ब्रॉठ कुन आव
साडि सँत्त्य् को'रनस लोलुँ सान वाव ।
दो'पनस से'दि म्बखुँ दर्शुन हाव
यस आसि टोठ श्री कृष्ण नाव ॥

दो'पनस श्री कृष्णुँ लगयो पॉरी
अँछ हो लोसम प्रॉर्य प्रॉरी ।
स्वरुँफस गॉयि जुँ हिसुँ कृष्ण तति द्राव
यस आसि टोठ श्री कृष्ण नाव ॥

कति कति प्यतुँ पीर मंगुँनाँविन
जाँद्य तुँ ताँवीज तस वातुँनाँविन ।
तिम जाँद्य तुलान ओस पानुँ भगवान
यस आसि टोठ श्री कृष्ण नाव ॥

मीरा काँचाह मंदुँछाँवुँख
बेहोश कॅर्य कॅर्य लरि पाँवुँख ।
तस ओस श्री कृष्ण ख्वनि ललुँवान
यस आसि टोठ श्री कृष्ण नाव ॥

दायि वो'न राजस कन थव कथन
मीरा कडुन जलायि वतन ।
कँरिथ आयि यात्रा तुँ गंगा स्नान
यस आसि टोठ श्री कृष्ण नाव ॥

दुष्ट छु आसान स्यठाह बलवान
दरमुँच महिमा छिनुँ ज़ानान ।
पापुँ सूँत्य् पनुँनिय नाव गो'बरान
यस आसि टोठ श्री कृष्ण नाव ॥

दाँसी छअ करान वील तय ज़ार
श्री कृष्णुँ यीतनय म्योन व्वन्य् आर ।
तिथय पाँठ्य म्य ति व्वन्य् दर्शुन हाव
यस आसि टोठ श्री कृष्ण नाव ॥



3. कृष्ण भजन

वुछ तँ भगवानस ख्वश क्याह आव

दुष्ट कनुस ओसुस मारुन पानस
दिवकी माजि हुंद को'रुन बहानय ।
वासुदीव बो'रुन मंज़ काँदखानस
वुछ तँ भगवानस ख्वश क्याह आव ॥

डीङ्ग्य्—वाँन्य् व्यसुँरॉविन क्याह पानस
गछुन ओसुस गोकुल पानस ।
तति जसुदायि माय बैर भगवानस
वुछ तँ भगवानस ख्वश क्याह आव ॥

जमुनायि तार द्युन ओसुस पानस
वासुदीव राज़य तुलुनय सूँत्य ।
जमुनायि पाद लागुँन्य् ऑसिस पानस
वुछ तँ भगवानस ख्वश क्याह आव ॥

काँलीनाग कडुन ओसुस पानस
बालि गिंदुनुक को'रुन बहानय ।
श्याम रंग बदलिथ आव पानस
वुछ तूँ भगवानस ख्वश क्याह आव ॥

चूरि थँन्य नियन तूँ ल्यो'वुनय बानस
असि हिसाब ह्यवान दानुँ दानस ।
द्वदुँ चो'ड फुटरुन तूँ थँन्य खे'यन पानस
वुछ तूँ भगवानस ख्वश क्याह आव ॥

द्वारिकायि राज करनि ये'लि गव पानस
गूपियन हुंद के'ह को'रुन नुँ परवाय ।
स्वदामस चूनि क्याह जर्यन मँहलुँ खानस
वुछ तूँ भगवानस ख्वश क्याह आव ॥

सरस्वती तूँ लँक्ष्मी छअ इकुँवटुँ आसान
मूर्ख बावुँ किन्य् छुनुँ असि बासान ।

द्वशवय छअ आसान अँकिसुँय थानस
वुछ तुँ भगवानस ख्वश क्याह आव ॥

गरिचिय सरस्वती युस कडि पानस
मस गछि मो'हस तुँ लूबस सूँत्य् ।
लँक्षमी क्रूद गव तुँ स्व च़लान पानस
वुछ तुँ भगवानस ख्वश क्याह आव ॥

पानो वँदिव पनुँनिस पानस
ज़ान थव तस जानानस सूँत्य् ।
सोरुय रोशन छु तस शाहानस
वुछ तुँ भगवानस ख्वश क्याह आव ॥
वर कर लँकरि तुँ बे'यि परमानस
प्यतरुन कुनिसुँय पानस छुय ।
हिसाब द्युन छुय कुनिसुँय जानस
वुछ तुँ भगवानस ख्वश क्याह आव ॥



4. शिव

बलुँ चानि यिनुँ मते ।
ललुँवथ सूरुँ मते ॥

कनुँके कनुँ दूरय
शामुँ रंगुँ बम्बूरय ।
त्रे' ने'त्र छिय च्य मथे
ललुँवथ सूरुँ मते ॥

दूर करतम यि अज्ञान
करुँहोँ चोनुय दान ।
यि ज़नम खसिहे रथे
ललुँवथ सूरुँ मते ॥

उमा छय च्य सूँती
बख्तन हुँज च्य प्रीती ।
यि मंगय छुय च्य अथे
ललुँवथ सूरुँ मते ॥


जगतुक छुख च्छु आदार
वनान छिय च्च्य ओ'मकार ।
टोठ छुख च्छु मे'य मते
ललुवथ सूरु मते ॥

व्वथरुन्च्य च्च्य मृगशाला
दौसी हुंद बोज हाला ।
लाल वंदुहय च्च्य मते
ललुवथ सूरु मते ॥

वैहरिथ छुय यि जाल
ये'म्य बुँ कॅरमुँच पामाल ।
म्वकुँलावतुँ व्वन्च्य ये'ते
ललुवथ सूरु मते ॥

ल्वकुँचार गव बुज्यर आव
जन्म म्योन मसौ रावुराव ।

दर्शनुं चानि खसुं रथे
ललुवथ सूरुं मते ॥



5. कृष्ण लीला

नाँल्य छस म्वख्तुँ माल, कनन कनुँ दूर ।
रटुन कृष्ण मनस मंज, करुस गुरुँ गूर ॥

मनुँकिस मंजलिस मंज सावुन
सावुन तुँ ललुँविथ अलुँरावुन ।
अँदरिय वायुस साज संतूर
रटुन कृष्ण मनस मंज, करुस गुरुँ गूर ॥

मनस मंज बनावुस च्युय आसन
राथ द्वह कर तँम्यसुँज च्यंतन ।
अदुँ यियि तुँ बिहि शामुँ रंगुँ बम्बूर
रटुन कृष्ण मनस मंज, करुस गुरुँ गूर ॥

नअ छुय मंदरन नअ मँशीदन
अर्पन करुस पनुन तन तय मन ।
सु छुय सुँत्य सुँत्य सु छुनुँ दूर
रटुन कृष्ण मनस मंज, करुस गुरुँ गूर ॥

मनुँसुँय अंदर ललुँनावुन
ललुँनावुन तुँ काँसि मय हावुन ।
पानय पानस अनतय सो'रूर
रटुन कृष्ण मनस मंज़, करुस गूरुँ गूर ॥

सूँत्य् छिनुँ बाँय बंद बे'यि परिवार
यि ति छुम नुँ गिलुँ कां'ह चंदस छम नुँ हार ।
सिरिफ श्री कृष्ण—चरनन हुंद छुम गो'रूर
रटुन कृष्ण मनस मंज़, करुस गूरुँ गूर ॥

उमायि श्री कृष्ण सुँज़ छय माय
श्री कृष्ण छुस बासान जायि जाय ।
राय छम दर्शुन दियम पूरुँ पूर
रटुन कृष्ण मनस मंज़, करुस गूरुँ गूर ॥



6. कुम्भ का मेला

म्य यितुय ओस तमन्ना ।
वुछुँहन सरस्वती जमुना तुँ गंगा ॥

ग्वरुँनुँय द्युतुनम द्यान
दो'पुँनम गंगायि कर श्रान ।
श्वद गछि तन तुँ मना
सरस्वती जमुना तुँ गंगा ॥

ये'लि वॉत्य् गंगायि हंग
तति ओस ब्याखुँय रंग ।
स्वर्ग—द्वार स्वरुँख रंगा
सरस्वती, जमुना तुँ गंगा ॥
जमुनायि वॉत्य् श्रानस
सॉरी ग्वसॉन्य् ऑस्य द्यानस ।
अँड्य ग्वसॉन्य् अँलिफ नंगा
सरस्वती, जमुना तुँ गंगा ॥

गंगा आँस ज़ोतान
तोतुँ ज़न आँस्य् बोलान ।
ओस तति सत संग्गा
सरस्वती, जमुना तुँ गंगा ॥

नफ़चुँय ओस तति गुदोम
वनान आँस्य तति ओ'मुँय ओम ।
कृष्ण नच़ान श्याम रंग्गा
सरस्वती, जमुना तुँ गंगा ॥
आँस्य् तीत्य् चरसी तुँ बँगी
शवुँ—नाथुँन्य् तिम सँगी ।
परान वीद तय गीता
सरस्वती, जमुना तुँ गंगा ॥
म्य युतुय ओस तमन्ना ।
सरस्वती, जमुना तुँ गंगा ॥



7. कृष्ण लीला

हा कावो ग्रावुँ म्याने वनतो तस श्री कृष्णस ।
ग्रावुँ म्याने वनतो तस ॥

मन मंजलिस पॉरोवुमस
ही तुँ मखमल व्वथुँरोवमस ।
कर यियि, तस प्रारान छस
ग्रावुँ म्याने वनतो तस श्री कृष्णस ॥

दजान छुस दूप तुँ कोफूर
वजान छुस अँदरिय साज संतूर ।
यियिहे योर पान वंदुँस
ग्रावुँ म्याने वनतो तस श्री कृष्णस ॥
कमि लोलुँ सालाह को'रमस
खिर तुँ खंडय थालाह बो'रमस ।
यियि सालस लाल वंदुँस
ग्रावुँ म्याने वनतो तस श्री कृष्णस ॥

दो'पमुत छु कृष्णन यो'हय ज्ञान
दुरियोधनुन ह्यू थँविज्यम नुँ मान ।
लछ कँरनम तथ मानस
ग्रावुँ म्याने वनतो तस श्री कृष्णस ॥

बाल कृष्णस छस प्रारान
छालुँ मारान यियि कर ।
यियि नतुँ व्वन्य् पान मारस
ग्रावुँ म्याने वनतो तस श्री कृष्णस ॥

रंगुँ रंगुँ माल ह्यथ छस प्रारान
लोलुँ पोश तस कित्य् छस चारान ।
कर यियि माल नॉल्य् त्रावस
ग्रावुँ म्याने वनतो तस श्री कृष्णस ॥

दूरि दूरि बूजुम यि आवाज
वनुँ कस छुम यि अँदरिम राज ।

कन थोवुम मुरली शब्दस
ग्रावुँ म्याने वनतो तस श्री कृष्णस ॥

पोशुँ मंजलिस जो'रुम पॉट्य अंजुल
बिहि तथ मंज श्यामुँ—स्वंदुर ।
लोलुँ मंजुलाह अलुरान छस
ग्रावुँ म्याने वनतो तस श्री कृष्णस ॥

वुछ म्वकट तस क्याह छु शूबान
सारिनुँय हुंद दिल छु लूबान ।
तथ म्वकुँटस चून्य् जरुँस
ग्रावुँ म्याने वनतो तस श्री कृष्णस ॥

सु छु ज़ामुत दिवकी माजे
अथन किच गरिमस वाजे ।
प्रारान छस लागस अथस
ग्रावुँ म्याने वनतो तस श्री कृष्णस ॥

जॅरी जामय त्रावस नॉली
दामानस चटुँस जॉली ।
तथ जामस तनि गंडुँस
ग्रावुँ म्याने वनतो तस श्री कृष्णस ॥



8. शारिका लीला

छ्वन्य् कर र्वनिनुँय असर चलन सौरिय
पौर्य लगय माता पौरिये ।
चान्यन पादि कमलन लगुँय पौरी
पौर्य लगय माता पौरिये ॥

दूरि प्यटुँ आमँत्य् अँस्य् छि ननुँवौरी
डेडि तल हय थँक्य् प्रौर्य प्रौरिये ।
करतय दया माता व्वन्य् मुँचराव तौरी
पौर्य लगय माता पौरिये ॥

अथनुँय क्यथ छि अँनिमुँच पोशुँ डौली
लोलुँ सान थँव चौर्य चौरिये ।
पादि पूजा करनुँच दितुँ अनुँवौरी
पौर्य लगय माता पौरिये ॥

पूजायि प्रारान छि अँस्य् मॉज्य् सॉरी
मंगान छिय हलम दॉर्य दॉरिये ।
कामना स्यद करतय रानी ब्रॉरी
पॉर्य लगय माता पॉरिये ॥

नाग चोन छुय शूबान सब्जॉरी
अलम चॉन्य् गुल अनॉरिये ।
अलुँमन चान्यन हय म्वख तॉर्य तॉरी
पॉर्य लगय माता पॉरिये ॥

नाव चोन लीखिथ छुय ओ'मकॉरी
यो'हय द्यान करान संत सॉरिये ।
तमि द्यानुँ सूँत्य् तॅर्य संत साध सॉरी
पॉर्य लगय माता पॉरिये ॥

उमा आमुँच छि ह्यथ अज सॉरी
थँचिमुँच छि ओ'श हॉर्य हॉरिये ।
दिस दरशो'न मुँचराव ज्ञानुँक्य तॉरी
पॉर्य लगय माता पॉरिये ॥



9. रॉगिन्या बजन

समव सॉरिय प्यमव परन
माजि हुँद्यन ख्वरन तल ।
प्यमव परन गछव शरन
माजि हुँद्यन ख्वरन तल ॥

को'रुम ग्वरस यो'हय संवाद
कर साँ सॉरिय दूर म्यॉन्व् व्याद ।
ग्वरन दो'पनम गछबी शरन
माजि हुँद्यन ख्वरन तल ॥

पजि मनुँ पूजा युस तति करान
तँम्यसुँय छि हरान सॉरिय पाप ।
तिम कम द्वख छि यिम नुँ तति बलान
माजि हुँद्यन ख्वरन तल ॥

यिम तति हुम तुँ यँज्ञ छि करान
तिमनुँय छि दिवान सतुँकुय ज्ञान ।
स्वय क्व—ग्रहघन समहार करान
माजि हुँघन ख्वरन तल ॥

कौत्याह छि गछान आशावान
करान छि माजि हुंदुय घान ।
साधन तुँ संतन छि से'दी बनान
माजि हुँघन ख्वरन तल ॥

यस प्यठ माजि यिवान आर
तस छि बोज्ञान वील तय ज़ार ।
सदाबहार गुल तस फवलान
माजि हुँघन ख्वरन तल ॥

उमा करान छय ज़ारुँपार
यथ बवुँ—सागरस दिज़्म तार ।
चानि दयायि सँत्त्यु तार छु बनान
माजि हुँद्यन ख्वरन तल ॥

गछव शरन प्यमव परन
माजि हुँद्यन ख्वरन तल ॥



10. कर क्षमा म्यान्यन अपराधन

माता नारुँ हय दँजमुँच म्यॉन्य तन
कर क्षमा म्यान्यन अपराधन ।
कर क्षमा म्यान्यन पापन तुँ शापन
कर क्षमा म्यान्यन अपराधन ॥

ग्वडुँ गछि दिन्य् मॉज्य् ततिच केँह ज़ान
अदुँ गछि खारुँन्य् ये'ति कां'ह हान ।
नतुँ मुशिकल बूगुन गछान अंज़ानन
कर क्षमा म्यान्यन अपराधन ॥

मित्र–रूपी शँत्रन च़ुँ छख सोज़ान
बोज़ान कोनुँ छख दासन पाय ।
दि बुद्धी यिमन मित्र–रूपी शँत्रन
कर क्षमा म्यान्यन अपराधन ॥

मोनुम ततिकिय छिम यिम पाप शाप
माता च्युँ छहँम करतम माफ ।
क्याज़ि सारिय वाँसि रो'टमय चोनुय दामन
कर क्षमा म्यान्यन अपराधन ॥

हरि हरि कॅरनस अँमिय परिवारन
लरि लरि ज़ोलुख म्योनुय पान ।
व्वन्य् च्युँय च़ठतम अपुँज्य बंधन
कर क्षमा म्यान्यन अपराधन ॥

व्यनुँयि किन्य् आमुँच़ व्वन्य् छस नँमिथुँय
करतम पादन तल व्वन्य् जाय ।
युथ बुँ करुँ राथ द्वह चॉनी सुमरन
कर क्षमा म्यान्यन अपराधन ॥

माता कासतम व्वन्य् च्छुँ यि अज्ञान
युथ म्य रोजि मनस चोन द्यान ।
पुशुँ मत्तुँ पावतम होंजन तुँ रादन
कर क्षमा म्यान्यन अपराधन ॥

ओ'मकार रूपी छुय चोन आसन
पनुँन्यन बख्तन टोठान छख ।
तमि सुमरन सूँत्य् से'द्य गछान साधन
कर क्षमा म्यान्यन अपराधन ॥

जयकार आँसिन तिमनुँय साधन
ओ'मकार जैर्य जैर्य को'रुख प्रानुँ-त्याग ।
उमा पौर्य लगिय तिहिँद्यन पादन
कर क्षमा म्यान्यन अपराधन ॥



11. लीला


हा जीवुँ कथ प्यठ मन ब्रँमुँरोवुथ ।
छायन पतुँ रावुँरोवुथ पान ॥

ग्वुरुँ पादन कुन पान पुशुँरोवुथ
ये'मि सूँत्य लगिहिय ये'ति तति तार ।
नावि मंज वँसिथुँय तार रावुँरोवुथ
छायन पतुँ रावुँरोवुथ पान ॥

क्रंजुँनुँय पतुँ द्वह—राथ रावुँरोवुथ
यि को'नुँ जो'नुथ भ्रम छु संसार ।
अनमोल यि जन्म पानुँ रावुँरोवुथ
छायन पतुँ रावुँरोवुथ पान ॥

क्याह कॅरिथ ब्रह्मण जन्म यि प्रोवुथ
तति क्याह वादय कॅरिथुंय आख ।
को'रमुत वादय ये'ति मॅशुंरोवुथ
छायन पतुं रावुंरोवुथ पान ॥

असथ कॅरिथुंय पान संदोरुथ
कामन तुं क्रूधन वो'लुनय नाल ।
असुंवुन म्वख पानय वदुंनोवुथ
छायन पतुं रावुंरोवुथ पान ॥



12. रँगिन्या

माता बुँ आयस दरबार चोन ।
कमि जे'वि करय बुँ शुकरानुँ चोन ॥

ये'लि ये'लि बुँ गँयस यीरय
ते'लि ते'लि बुँ रँटुँथस चीरय ।
ह्यचुँथस ख्वनि तुँ को'रथम माजि—तोन
कमि जे'वि करय बुँ शुकरानुँ चोन ॥

नाहकय लँजिस ये'लि दावुँसुँय
तचि से'कि तुँ तँतिस तापुँसुँय ।
विजि विजि को'रुथ सायुँबान म्योन
कमि जे'वि करय बुँ शुकरानुँ चोन ॥

बंजर ये'लि ओस खेत म्योन
ओसुय म्य आसरुँ मॉज्य् चोन ।
दयायि ज़लुँ फो'ल यि बाग म्योन
कमि ज़े'वि करय बुँ शुकरानुँ चोन ॥

रंगुँ रंगुँ पोशन लँज्य् फुलय
माता रछुम पादन तलय ।
गुल फो'ल तुँ दिल फो'लुँरोवुथ म्योन
कमि ज़े'वि करय बुँ शुकरानुँ चोन ॥

माता करान छस व्वन्य व्यनती
यि व्वन्य मंगय, व्वन्य दिम ती ।
पूज़ायि लागतय यि मन म्योन
कमि ज़े'वि करय बुँ शुकरानुँ चोन ॥

अंतस द्वख मुँ कां'ह पावुम
सनम्वख दरशो'न हावुम ।
असुँवुन निजि व्यमान म्योन
कमि जे'वि करय बुँ शुकरानुँ चोन ॥



13. श्री कृष्ण लीला

गूकल छा किनुँ बिन्द्राबन ।
रुखमनि वरनि द्राव मनमोहन ॥

दिवकी हुंद ये'लि तस आव आर
वासुँदीवस द्युतुन जमुनायि तार ।
जमुनायि मीढ्य दित्यनस पादन
रुखमनि वरनि द्राव मनमोहन ॥

गूकल जसुदायि रो'ट नालय
द्वदुँ—हरुँकिय बॅर्यनस प्यालय ।
दामुँ दामुँ द्वद च्यव गूपालन
रुखमनि वरनि द्राव मनमोहन ॥

गूपियन सूँत्य तति गिन्दुनय रास
राधायि सूँत्य को'रनय अर्थुवास ।
मछुँनुँय तस तति गों'डुन मछुँबंद
रुखमनि वरनि द्राव मनमोहन ॥

जमुनायि प्यठ गिन्दुन बालन
सूँचुन काँली नाग मारन ।
यँड प्यठ वाँयनस मुरली धुन
रुखमनि वरनि द्राव मनमोहन ॥

द्रोपदी बे'नि हुँज आँसुँस माय
गरि गरि कँरनय तसुँजुँय राय ।
सासुँ बँद्य तँमिसुँय कँरिनस वरदान
रुखमनि वरनि द्राव मनमोहन ॥

कंसस वो'लुन ये'लि अहंकार
बालक अवरस्थायि मंज को'रुन यि वार ।
पापस हय गालान सुय निरंजन
रुखमनि वरनि द्राव मनमोहन ॥

सुदामा ओसुय तस चाटुँ बोज
चूरि करुँ तँम्य् ख्यव रूदुस नुँ हो ।
हिसाब ह्यो'तुँनस तिमन दानन
रुखमनि वरनि द्राव मनमोहन ॥

बजनि लँग्य् तति ढोल तुँ बाजय
श्री कृष्ण बन्यव तति राजय ।
शरन आयि तति साँरी सतज्जन
रुखमनि वरनि द्राव मनमोहन ॥

शतरंज गिंदान ओस रुखमनि सूँत्य्
तति आँस्य डेडि तल डीड्य्वॉन्य कूँत्य् ।
आलव लोयिनस तँम्य् सुदामन
रुखमनि वरनि द्राव मनमोहन ॥

बखुँचनस सॉरिय तति पाप शाप
नालुँमति रो'टुन तुँ गोस इन्साफ ।
मँहँल बनोवुनस को'म दानन
रुखमनि वरनि द्राव मनमोहन ॥

उमायि कृष्णुँन्य सिरिफ छय आश
सुय दियम ने'त्रन सतुक प्रकाश ।
शे'हजार दियम तमि विजि प्रानन
रुखमनि वरनि द्राव मनमोहन ॥



14. कृष्ण बक्ति

श्री कृष्ण पाद सुय मनि मंजु वालि ।
वालि सुय चालि युस द्वह तय राथ ॥

विषय विकारन युस दियि टख
सुय हे'कि रूजिथ नारस नख ।
स्वन बनि ते'लि ये'लि नारुं पान जालि
वालि सुय चालि युस द्वह तय राथ ॥

पर तुं पान युस हे'कि मँशिराँविथ
सुय हे'कि सतुँची वथ प्राँविथ ।
अँदुँरिम वॉर—बाव अँदुँरिय जालि
वालि सुय चालि युस द्वह तय राथ ॥

श्री कृष्ण—कृष्णाय मीरायि को'र
जगत्तुक प्रेम्—रस पानस बो'र ।
अदुँ श्री कृष्णस सूँत्य् गिंदनि लँज बालि
वालि सुय च़ालि युस द्वह तय राथ ॥

द्रो'पदी को'र ये'लि मंज सभायि याद
कृष्णन बूज्य् लोलुँक्य् संवाद ।
सासुँ बँद्य गज वँलिनय तस बालि
वालि सुय च़ालि युस द्वह तय राथ ॥

सुदामन डेडि तल लोयिनस सदा
अदुँ वुछ श्री कृष्णन तिम अदा ।
लोलुक को'म ख्योनय डॉल्य् डॉल्य्
वालि सुय च़ालि युस द्वह तय राथ ॥

क्रूद बँरिथुँय ओस दुर्योदन
सतुँचे कथन थो'वनय नुँ कन ।
अदुँ को'त वाते कृष्णुँनि चालि
वालि सुय च़ालि युस द्वह तय राथ ॥

राधायि सूँत्यन ग्युंदुनय रास
लोल बँरिथुँय को'रनय अथुँवास ।
जोरुँ कति नेरि प्रेमी मिसाँली
वालि सुय च़ालि युस द्वह तय राथ ॥

युस नुँ इन्सान हे'कि प्रज़नाँविथ
तस क्याह नेरि सीर बाँविथ ।
अँदरुँ दज़ि पानुँ तुँ ने'बरिम्यन ति ज़ालि
वालि सुय च़ालि युस द्वह तय राथ ॥

उमायि श्री कृष्णुन्य् छय आ
द्यव मेल्यस द्वन ने'थुँरन गाश ।
वो'मुक ओ'श वसान छुस च़ालि च़ालि
वालि सुय च़ालि युस द्वह तय राथ ॥



15. मतय रोशतम माता

मतय रोशतम माता बुँ हय करय ज़ारुँपार ।
हे त्रिपोर—स्वंदरी च्य जयजयकार ॥

बुँ आयस दूरि प्यटुँ चँटिथुँय माता को'ह
अज़ छअ जेठुँ—ऑठम रुत छु चोन द्वह ।
बुजुम अज़ छु खुलुँ आसान दरबार
हे त्रिपोर—स्वंदरी च्य जयजयकार ॥

नव द्वह छि चॉनी, च्युँय नव दुर्गा
ये'ति नय छु खॉली नेरान अज़ माता कां'ह ।
नवन द्वहन च्युँ बाँगारावान दर द्वार
हे त्रिपोर—स्वंदरी च्य जयजयकार ॥

छरि अथुँ आयिसय, बुँ हय छस नाबुँकार
चुँय हय छख माता म्यॉन्य पालनहार ।
डेडि तल वॉतिथ त्रॉवुँहम अश्य् खार
हे त्रिपोर—स्वंदरी च्य जयजयकार ॥

वनुँहा बुँ माता, वनुँनस छुम नुँ वार
जिगरस छुम गोमुत पारुँ पार ।
च्य क्याह छु वनुँनुय चुँ पानुँ छख जॉन्यकार
हे त्रिपोर—स्वंदरी च्य जयजयकार ॥

पनुँनि अथुँ लेखतम मॉज्य अख ओ'मकार
सुय छुय जन्मन हुंद तार ।
त्रावुँ बुँ चान्यन पादन तल व्यवहार
हे त्रिपोर—स्वंदरी च्य जयजयकार ॥

चे'य वुछ वुछ मॉज्य् बुँ हय छस तोशान
कवय छँहँम रोशान, दिम पनुँन्य् ज़ान ।
चे'य अथि ज़गतुक माता व्यवहार
हे त्रिपोर—स्वंदरी च्य जयजयकार ॥

उमा छय गुल्य् गँडिथ करान माता ज़ारुँपार
ये'ति तति माता दिज्यम तार ।
गँछिनय दया, म्य यि ज़नम रथि खार
हे त्रिपोर—स्वंदरी च्य जयजयकार ॥



16. ॐ

ॐ भूर्भवः स्वः नादय ।
ॐ दया दय ॐ दया ॥

युस करि ग्वरुं—मंत्र यादय
तँमिसुँय हावान सतुँचिय वथ ।
तँमिसुँय करान ग्वर पूरुँ वादय
ॐ दया दय ॐ दया ॥


ये'मिसुँय आसि मनस संतोश
तँमिसुँय रोज़ान सोरुय होश ।
कमसुँय तस बनान छु ज़्यादय
ॐ दया दय ॐ दया ॥

युस मनसुँय मंज जरि ओ'मकार
सुय वुछि दयस साक्षातकार ।
पूर यियि तस होंज तुँ रादय
ॐ दया दय ॐ दया ॥

यिमय छि पूजा करान श्री चक्रस
तिमय छि जन्म रथि खारान ।
तिमनुँय वनान छि संत तुँ साधय
ॐ दया दय ॐ दया ॥

यिमय राथ द्वह करान सुमरन
तिमय वुछान छिय हनि हनि ।
दूर गछान तिमनुँय छि व्यादय
ॐ दया दय ॐ दया ॥

आमुँच उमा डेडि तल फँरियादय
कन थव तस लोलुँ नादन ।
मंगान छय स्वख तुँ संताश ज़्यादय
ॐ दया दय ॐ दया ॥



17. गुरु महिमा

युस करि पूजा ग्वरुँ—पादन ।
तति बनि ग्वरुँ—आश्रम ॥

युस कन थवि ग्वरुँ—वाखन
तस फवलि तन तय मन ।
वथ हावुँनस तस छि सत ज़न
तति बनि ग्वरुँ—आश्रम ॥

युस करि सत—ग्वरुँ सुँज़ ज़ान
तस मेलान सतुँच ज़ान ।
दूर गछि तस अज्ञान तुँ भ्रम
तति बनि ग्वरुँ—आश्रम ॥

युस रटि ग्वरुँ सुंद दामन
स्यद गछ्यस मनि कामन
तथ गरस गछि नुँ केँह कम
तति बनि ग्वरुँ—आश्रम ॥

युस थवि सत—ग्वरुँ सुँज आश
ने'त्रन यियस प्रकाश ।
तस छु आसान शम तय दम
तति बनि ग्वरुँ—आश्रम ॥

युस थवि सत—ग्वरुँ सुँज माय
तस आसि स्वर्गस मंज जाय ।
युस करि पूजा ग्वरुँ—पादन
तति बनि ग्वरुँ—आश्रम ॥



18. कृष्ण लीला

हे कृष्ण यिखना नटवर चाले ।
मुरली वाले सोन ॥

वासुदीव राजुनि अकुंनंदुनय
दिवकी हुँदि नंदनय ।
काँदखानुँ खूलुथ, वोत कुस च्य चाले
मुरली वाले सोन ॥

जमुनायि कोताह ओस चोन तमनाह
पादन मीठ्य दिमुँना ।
लोलुँ हँच जमुना लॉजिथन ताले
मुरली वाले सोन ॥

गूकल जसुदायि रो'टनख नालय
नंदुँ गोरिनि लालय ।
प्रेयमुँच थँन्य ख्योवुँख च़ालि च़ालय
मुरली वाले सोन ॥

गूर्य बालुँकन सूँत्य् गिंदुथ क्याह बाले
को'डथन काँल्य् नाग–नागिन ।
पम्पोश ह्यथ आँयिय डाले
मुरली वाले सोन ॥

बालक अवरस्थायि कंसन दितुय नाद
गछुन ओस तस बरबाद ।
होरुन तुँ ओ'श क्याह त्रोवुन च़ाले
मुरली वाले सोन ॥

लोलुँ हो'त सुदामा ओय डेडि तल
छँल्यथस क्याह खोर फँल्य् ।
भावुक को'म तँम्य ओ'नुनय डॉली
मुरली वाले सोन ॥

हे कृष्ण यिखना मोहनी चाले ।
मुरली वाले सोन ॥



19. शिव भक्ति

शमतो ज़ीवो दम–दम परतो
ॐ नमः शिवाय ॥

शिव कति छ़ाडुँन छुय सु निराकार
मनुँसुँय बनाव आकार ।
मनुँकिय पोश लागुस पूज़ाये
ॐ नमः शिवाय ॥

क्याह छुय प्रोवमुत, क्याह छुय प्रावुन
यी गँज़रावान छुख ।
प्रॉव्य् प्रॉव्य् त्रावुन छुय ये'थ्य् जाये
ॐ नमः शिवाय ॥

कामन तुँ क्रूधन गों'डमुत छुनय नार
लोगुथ तवय बे-आर ।
विशय भूगन टख दिथ परतो
ॐ नमः शिवाय ॥

अपुजुय छअ माया, अपुजुय छअ काया
अपुजुय छु संसार ।
यी व्यचौरिथ रुम रुम परतो
ॐ नमः शिवाय ॥

टोटुय गोम दे'ह, टोटुय म्य सोरुय
टोटुय गोम परिवार ।
यिम टॉट्य खोचान पतव छाये
ॐ नमः शिवाय ॥



20. आराधना

माता म्य चाने बरुँ—तलय त्रोव सर ।
हर मुशिकलन चुँय आसान कर ॥

चुँय म्यॉन्य हँकीम तुँ हॉकिम ति चुँय
चुँय म्यॉन्य वँकील तुँ वँसील ति चुँय ।
पज़रुँच अदालत पानुँ कर
हर मुकिलन चुँय आसान कर ॥

गरि गरि बुँ स्वरुँहॉ चोनुँय नाव
माता म्य स्वय रुँच वथ चुँ हाव ।
पनुँनि अथुँ मनस म्य ॐकार जर
हर मुशिकलन चुँय आसान कर ॥

मुरजोवुमुत छुस पम्पो
माता म्य नय छुम कां'ह ति होश ।
सग सोजतम नतुँ गछुँ बुँ बर
हर मुशिकलन च्युँय आसान कर ॥

रंगुँ रंगुँ बुँ मौँजी तंग आस
मँग्य् मँग्य् च्य मौँजौय तंग आस ।
यी ख्वश करिय व्वन्य च्य मौँज्य् ती कर
हर मुशिकलन च्युँय आसान कर ॥

उमा छय करान ज़ारुँ-पार
माता च्य यीतनय म्योन केँह आर ।
यी शूबि व्वन्य मौँज्य् ती च्युँ कर
हर मुशिकलन च्युँय आसान कर ॥



21. शारिका स्तुती

आमुँच गदा बोऒुम सदा ।
श्री शारिका देवी नमः ॥

चँक्रीश्वरी हाजत रवा
चे'य निश यिवान शाहो गदा ।
वाह वाह च्य लँक्षमी थापना
श्री शारिका देवी नमः ॥

चँखरीय छु चोन शोलुँ मारान
दास चॉन्य छि डेडि तल प्रारान ।
लोलुँ सान करान छिय चॉन्य त्वता
श्री शारिका देवी नमः ॥

गमुँ हँत्य् छि आमुँत्य् लारान
ने'त्रव छि लोलुँ ओ'श हारान ।
सिद्ध कर चुँ साँन्य मनि कामना
श्री शारिका देवी नमः ॥

युस लोलुँ रटि चोन दामनाह
तस सिद्ध गछान मनि कामनाह ।
सूँत्य् सूँत्य् रोजान तस सदा
श्री शारिका देवी नमः ॥

अष्टा दशबुजा चुँ आसुँवुँन्य
दासन पनुँन्यन बासुँवुँन्य ।
पापन चुँ करुँवुँन्य छख क्षमा
श्री शारिका देवी नमः ॥

थँकिथुँय म्य डेडि तल त्रुवुमय सर
यी ख्वश करिय मॉजी ती च़ुँ कर ।
दॉसी बुँ छस, सथ चॉन्य छमा
श्री शारिका देवी नमः ॥



22. वटुँ–कनिनुँय बटनी


वटुँ–कनिनुँय बटनी पूजा मुँ कर
पूजा छय ग्वडुँ ग्वर–पादन कर ।
रठ मंत्र पनुँनी पहचान कर
वटुँ–कनिनुँय बटनी पूजा मुँ कर ॥

पूजा छय पनुँनिस मनुँसुँय कर
सत–असत व्यचार, सतुँसुँय प्यठ दर ।
सतुँ किस सँदरस अपोर तर
वटुँ–कनिनुँय बटनी पूजा मुँ कर ॥

पूजा छय ग्वडुँ इनसानन कर
दुखी मनन तिमन गौरजानन कर ।
छुय ताकथ तुँ कुनि रंगुँ सहायता कर
वटुँ–कनिनुँय बटनी पूजा मुँ कर ॥

फाकुँ दँरिथ केंछा रुत कार कर
बे—जबानन, बे—सहारन हुँज सहायता कर ।
त्रेशि—हतिनुँय बो'छिनुँय ग्वडुँ यड भर
वटुँ—कनिनुँय बटनी पूजा मुँ कर ॥

ओय दयि पो'छ, लोलुँ सान मुँचराव बर
दय जॉनिथ तँम्यसुँज पूजा कर ।
ड्यकुँ मुँचरिथ तँमिस सूत्य् स्यँज कथ कर
वटुँ—कनिनुँय बटनी पूजा मुँ कर ॥



23. मन म्योन चोन आसन

दितम व्वन्य पनुँन्य सुमरन ।
मन म्योन चोन आसन ॥

आसन पॉरोवुमय
तनुँ मनुँ पुशुँरोवमय ।
वंदय जुव यिमुँनुँय पादन
मन म्योन चोन आसन ॥

मन म्योन चोन जूलय
बुँ करुँय गुरुँ गूरय ।
सोमन अलुँरावुन मन म्योन
मन म्योन चोन आसन ॥


मन म्योन चोन गूर्यवान
यिज़ि कामदीनव सान ।
पूज्य् करुँ कामदीनन
मन म्योन चोन आसन ॥

मन म्योन चॉन्य जमना
गिंदतुँ बालि छुम तमना
दूर करतुँ कालुँ स्वर्फन
मन म्योन चोन आसन ॥

मन यि म्योन बिंद्राबन
यितुँ ह्यथ यिमन गूपियन ।
गिंदव रास राथ क्यो'ह द्यन
मन म्योन चोन आसन ॥

मन म्योन चॉन्य मथुरा
कनुँसस तुल थथुँराय ।
डीड्य–वॉन्य करुख विसर्जन
मन म्योन चोन आसन ॥

मन म्योन चॉन्य द्वारिका
डेडि तल छुय सुदामा ।
कन थवुस यिमन नादन
मन म्योन चोन आसन ॥



24. यिनय माता त्रावुँहँम दूर

चॉन्य दूरिरन को'रनम सूर ।
यिनय माता त्रावुँहँम दूर ॥

बुँ नय वॉचुँस पूर धर्मस
मॉज्य् पूशिस नुँ केँ'ह ति कर्मस ।
खो'ट्य कर्मन हय ओ'नुनम ग्यूर
यिनय माता त्रावुँहँम दूर ॥

आमुँच छसय चानि डेडि तल
चँलुँरावतम अँदरिम मल ।
चानि दर्शन सँत्यू यियम नूर
यिनय माता त्रावुँहँम दूर ॥

मुश्किल गोम वॅनिथ ह्यकुँ कस
पुशि छुँनतम अथ कर्मस ।
हितकारुँक्य् अछर लेख पूर
यिनय माता त्रावुँहॅम दूर ॥

बे'यि करुँ बुँ सुय दर्शुन
लोलुँ करुँय बुँ पोशुँ वरुँन ।
ॐ लेखुँवुन वुछुँ बम्बूर
यिनय माता त्रावुँहॅम दूर ॥

मो'ह मायायि वो'लुनम नाल
गाँमुँच छस तवय बेहाल ।
मो'ह तुँ अंधकार करतम दूर
यिनय माता त्रावुँहॅम दूर ॥

ऑस्य् ऑस्य् मॉज्य् छुम नुँ संतोश
गोमुत छुस तवय बेहोश ।
संतोशुक ज्ञान दिमी पूर
यिनय माता त्रावुँहँम दूर ॥

हँर्य हँर्य कँरुँस गरुँनय
चोन नाव नय छस स्वरनुँय ।
परिवारन हय ओ'नुनम ग्यूर
यिनय माता त्रावुँहँम दूर ॥

आमुँच़ दॉसी छय शरनुँय
लोलुँ पेमुँच़ छय परनुँय ।
ज्ञानुँक्य् दरवाजुँ मुँच़राव पूर
यिनय माता त्रावुँहँम दूर ॥



25. तूफानुं मंजुं कड नाव

दयि व्वन्य पनुंन्य् दयिगथ हाव ।
तूफानुं मंजुं कड सॉन्य नाव ॥

जानानुं कॅरिख मारय
सँतियन वोयुख आरय ।
यि बूजिथ अँशिसुंय लँज्यमुँच दार
तूफानुं मंजुं कड सॉन्य नाव ॥

खध लो'ग कोरुँवन तुँ पांडुँवन
गालुँवुन च़ुँ पान छुख असरन ।
त्युथ कर युथ नुँ सॉन्य गछि हार
तूफानुं मंजुं कड सॉन्य नाव ॥

तूफान आव च्ववापॉरी
श्री कृष्ण यि अवतॉरी ।
दया कर तुँ बंद गछि यि विजि—वाव
तूफानुँ मंजुँ कड सॉन्य नाव ॥

यिम नुँ ज़ां'ह ज़ूनि ऑस्य् नेरान
वति वति छि कोरि ह्यथ फेरान ।
बे'नि बायन ति रूदुय नुँ भाव
तूफानुँ मंजुँ कड सॉन्य नाव ॥

बद छनुँ वातान पानुँसुँय
प्रारान छि अथ रथ—बानसुँय ।
सुदर्शन च़क्र व्वन्य बुथि त्राव
तूफानुँ मंजुँ कड सॉन्य नाव ॥



26. के'हजि लॉगिथ दकुँनुय

त्रॉव जायुन तुँ वॉलिंज छि फूकुँनिय ।
के'हजि लॉगिथ दकुँनुय मॉज्य् ॥

ओस पॅज्य् पॉठ्य असि गॅरीब खानय
सानि खॉतरुँ ओस मॅहल खानय ।
करान हे'रि ब्वन तुँ डेर ओस स्वखुँनुय
के'हजि लॉगिथ दकुँनुय मॉज्य् ॥

यूत ओ'नुँहॉयि माता शुर्यव ग्यूर
शुर्य त्रॉव्यथख वछुँ तलुँ दूर ।
माजि रो'स्य् शुर्य बिहिथ छिनुँ ह्यकुँनुय
के'हजि लॉगिथ दकुँनुय मॉज्य् ॥

चोन दामान रो'टमुत छु चीरय
सोन सीर क्याजि प्यव वति प्यठ ।
हुँकुँ दरवाजुँ दिथ छिनुँ ह्यकुँनुँय
के'हजि लॉगिथ दकुँनुँय मॉज्य् ॥

मॉज्य् करतय अमृत वरशुन
बे'यि करुँहँव चोन दर्शुन ।
दर्शुनसुँय तँरिथ छिनुँ ह्यकुँनुँय
के'हजि लॉगिथ दकुँनुँय मॉज्य् ॥

मॉज्य् आमुत असि व्वन्य जेरय
कूत फेरव डेरुँ डेरय
अख ख्यथ च्यथ, किराय दिथ नुँ ह्यकुँनुँय
के'हजि लॉगिथ दकुँनुँय मॉज्य् ॥

मॉज्य् करतय व्वन्य सोन चारय
अँस्य् हय गॉमुँत्य् छिय मारय ।
काँसि निश केँह वँनिथ छिनुँ ह्यकुँनुँय
केँहजि लॉगिथ दकुँनुँय मॉज्य् ॥

त्रॉव जायुन तुँ वॉलिंज छि फ्रकुँनिय ।
केँहजि लॉगिथ दकुँनुँय मॉज्य् ॥



27. उँह ति करय ना

अँदुरिय बुँ च्यमा प्यालुँ क्याह
उँह ति करय ना ।

बॅर्य बॅर्य यिम ज़हर प्यालुँ च्यमा
उँह ति करय ना ॥

यिमुँनुँय म्य वों'दुय जुव तुँ जान
तिमुँवुँय कँरुँस बुँ कवरबान ।
हँटिस प्यठ छम श्राख वनतम
उँह ति करय ना ॥


यिहुँजुँय म्य आँसुँय शान
तिमवुँय म्य ह्यो'तुय जान ।
कँरहँस हा तानुँ—तान वनतम
उँह ति करय ना ॥

यिमुँनुँय प्यठ म्य आव आर
तिमुँवुँय म्य द्युतुय नार ।
च्वपौर्य को'रहँम वार वनतम
उँह ति करय ना ॥

युसुय म्य ओस मददगार
तिमुँवुँय बुँ कँरहँस खार ।
कौँचाह बुँ गँयस लाचार वनतम
उँह ति करय ना ॥

यसुंद म्य व्वन्य ह्यो'त सहार
सुय म्य मददगार ।
सुय म्य दियि तार – तँस्य्
लोल बरय ना ॥

बॅर्य बॅर्य यिम ज़हर प्यालुँ च्यमा ।
उँह ति करय ना ॥



28. जय साँई बाबा की

कितना सुंदर था वह घर
जहां उन्होंने जन्म लिया ।
जय उनकी माता की
जय जय साँई बाबा की ॥

शिर्डी में लगाया दरबार
सबको दिया अपना प्यार ।
जय जय उनके चरणों की
जय जय साँई बाबा की ॥

कितने ऊंचे थे विचार
हर जगह किया सत्य का प्रचार ।
जय जय शुभ विचारों की
जय जय साँई बाबा की ॥

भक्तों ने किया जान निसार
उनको था बाबा का प्यार ।
जय जय उनके भक्तों की
जय जय साँई बाबा की ॥

सबके करते थे दुःख दूर
सब को दिया आंखों में नूर ।
जय जय उस सत-वाणी की
जय जय साँई बाबा की ॥



भजन माला

उमा गुरुवा

Internet Edition: **M.K.Raina**
